

laudat Comes, simulque obsecrat ne credat si forte ab Anglis audiat se pacem expetere; contra omnes pacis conditiones licet æquissimas animum se obfirmasse, & fidem Hispano datam constantissime observaturum. Literis tamen missisque subinde nuntiis interea de submissione cum Comite Ormondia simulate intercessit, & iniquissima postulavit.

Robertus
Comes
Essexiæ
Prorex.
1599.

Hic erat Hiberniæ status fere deploratus, cum Regina Elizabetha Robertum Essexiæ Comitem tunc Gadibus Hispaniæ captis celeberrimum pro spectata prudentia, fortitudine, & fide Hiberniæ Proregem ad detrimenta facienda designat, amplissima addita potestate belli componendi, ac etiam quod importunitate quasi extorsit, remittendi & condonandi in ipsam majestatem crimina, quæ semper in singulorum Proregum Diplomatis hisce verbis sic fuit ante restricta (*proditionibus personam nostram, heredes, & successores tangentibus exceptis.*) Et provide sane hanc condonandi hujus generis crimina auctoritatem obtinuit, cum quascunque rebelliones Principis *personam tangere* Iurisperiti statuunt. Exercitus illi decretus quantum postulavit, nec Hibernia prius viderat, scilicet xv m pedites, & equites mille trecentos, qui postea etiam ad viginti millia suppletus, & in mandatis datum, ut cæteris quibuscunque posthabitis, in Comitem *Tir-Oen* Archi-rebellem tanquam in caput, omnem belli tempestatem converteret, & ipsum præfidiis ad *Lacum Foile*, & *Bala-Shanon* quamprimum premeret; quod faciendum ille semper inculcaverat, & neglectum fuisse superioribus Proregibus criminose objectaverat. Ita insignis nobilitatis flore comitatus Londino plebe faustis acclamationibus prosequente, sed love sereno tonante, sub finem mensis Martii profectus adversa tempestate conflictatus in Hibernia appulit, gladioque pro more accepto, statim contra ac in mandatis habuit, suafu quorundam è Regio consilio qui in sua privata nimis intenti, adversus minutos quosdam in Momonia rebelles rebelle Comite neglecto cum omnibus copiis signa extulit, captoque *Cahir* Ed. Butleri Baronis de *Cahir* castro, in quod *Sviro* flumine circumfusus quidam seditiosi se receperant, & abacto magno pecorum numero late sui terrorem sparsit, & rebelles circumquaque in sylvas & saltus dispersit. Interim tamen clades non minima accepta quorundam ignavia qui sub H. Harringtonio meruerunt, in quos acriore disciplina animadvertit. Nec ante mensem Iulium jam divergentem rediit, militibus lassatis, affectis, & numero supra fidem accisis.

Cum reversus accepisset Regiam hanc damnosam expeditionem acerbe ferre, & illam in Vltoniam contra Comitem omnino

urgere, datis literis culpam in Hiberniæ Consiliarios quibus ob multiplicem in rebus Hibernicis usum non poterat non acquiescere, transtulit, sancte pollicitus se quam primum in Vltoniam progressurum. Hisque literis vix traditis alias submittit quibus significat sibi necessario iter in *Offaliam* Dublinæ vicinam contra *O-Conoros*, & *O-Moilos* ibi tumultuantes deflectendum, quos sane facile & feliciter levibus præliis contudit. Reversus lustrato exercitu ita extenuatum invenit ut novum mille militum supplementum per literas chirographis Consiliariorum Hiberniæ subscriptas ad expeditionem quam jam suscepturus in Vltoniam, petierit.

Iam certus in Vltoniam bellum convertendi Coigniero Cliffordo Conachtia Præfecto imperat, expeditis cohortibus versus *Belike* proficisci, ut Comitis copias distraherentur, dum ipse alia ex parte aggrediretur. Cliffordus statim cum mille quingentis profectus, milites longo itinere delassatos, & à pulvere bombardario minus instructos *Curlew* montes superare jubet, quos cum maximam partem superassent, rebelles duce *O-Rorcko* ex improviso irruunt: Angli facile principio repellunt, susceptum ita pergunt, sed cum hostes jam bombardarium pulverem deesse senserint, eos denovo adoriuntur & de via languentes resistendo impares in fugam conjecerunt. Cliffordus una cum Henrico Ratcliffio de *Ordiallo* ex equestri Ordine cæso. Interim in Anglia supplementum quod Prorex petiit, conscribitur, & mittitur, verum pauculis interjectis diebus, aliis literis significavit se nihil aliud hoc anno amplius præstare posse quam cum mccc, pedibus & ccc equitibus Vltoniæ limites adire. Quo circa Eidus Septembris pervenit, cui se è collibus è longinquo uno & altero die Comes cum suis se ostendit, demumque Haganus præmissis Proregem petiit, ut una colloquerentur, quod ille abnuit, respondens si Comes illum convenire vellet, die crastino ante principia in acie inventurum. Quo die levi facta velitatione, Eques è Comitis turmis alta voce Comitem pugnare nolle denuntiat, sed cum Prorege colloqui, at nullo modo inter acies in procinctu. Die insequenti ut Prorex pergit, obvius illi occurrit Haganus qui declarat Comitem misericordiam Regiæ & pacem exposcere, & ut tantisper exaudiatur obsecrare; quod si concederet, illum cum omni observantia ad vicini fluminis vadum, *Balla-Clinch* vocant, expectaturum, vadum illud haud procul abest à *Louth* primario Comitatus oppido, & vicinum est castro Gerardi *Fleming*. Eo Prorex præmisit qui locum explorarent, illi Comitem ad vadum offendunt, qui docet quamvis flumen intumuisse, facile utrin-